

清

史

稿

清史稿

列傳二百五十四

李秉衡

字 益 州

聶士成

羅榮光

壽山

湖南 寧遠 人

鳳翔

字 五 華

李秉衡字鑑堂奉天海城人初入貲爲縣丞遷知縣光緒五年除知冀州歲飢發倉粟不給州俗重紡織布賤爲酸金求遠遷易糧歸而裁其價以招民民獲甦越二年擢知永平府部議追論劫案貶秩李鴻章上其理狀請免議不獲時稱北直廉吏第一以張之洞薦超授浙江按察使未到官移廣西十年平峒寨亂督二品秩明年法人假越事寇邊秉衡主龍州西連局是時財匱戰士不得餉蹂屍輿斷無人過問秉衡益節儉汰浮費無分主客軍給糧不絕戰卹功賞力從厚復瓶設醫局治負傷軍士身自拊循之日數四雖末弁亦延見殷殷以殺敵報國護撫命下驩聲若雷動與馮子材分任戰守諒山之捷彭玉麟等疏言兩臣忠直同得民心亦同功最盛予優敘重申前命爲護撫整營制舉賢

能貨遣越南游衆越事漸告甯新任巡撫沈秉成莅官迺乞病去二十年東事棘召爲山東巡撫至則嚴紀律杜苞苴以威海旅順鎗北門遂率師駐煙臺聞旅順不守劾罷丁汝昌龔照燠等以警威海守將旣而日軍浮三艦窺登州秉衡悉萃精兵於西北而榮城以戎備寡爲日軍所誘而獲時論詬之其時大刀會起主仇教勢漸張二十三年會衆戕德國教士德使海靖要褫秉衡職編修王廷相力爭之徙督四川海靖請益堅迺罷免於是秉衡隱安陽居三年剛毅入樞廷薦之起入都廷相慕其名往訪遂訂交朝命秉衡詣奉天按事奏廷相自隨旣至糾不職者數人皆廷相微服所訓知者還會御史彭述疏請整飭長江水師詔使秉衡往秉衡固辭太后責勉之遂行歲餘爭禍作枋事者矯詔趣戰電各省諸疆臣失厝商之鴻章於是定誓保東南約秉衡與焉無何又請募師入衛至京入覲太后力主戰遂命統張春發陳澤霖夏辛酉萬本華四軍出屯楊村河西塢戰纔合張萬二軍先潰澤霖自武清移壁聞礮聲軍皆走秉衡不得已退通州疾書致各將領述諸軍畏葸狀飲金死事聞優詔賜卹設忠

節聯軍索罪魁請重治以先死免議詔褫職奪卹與廷相字梅岑直隸承德人
本籍山東少劬學以孝稱光緒十三年進士以編修督山西學政口外七廳游
飢有司匿不聞爲上流民殘弊狀獲賑如腹地二十三年轉御史敢言事時宗
室覺羅官學久廢不糾廷相謂培材宜自近始請依八旗官學新章求實際議
行國用患不足計臣議加賦廷相力申李鴻藻議爲民請命事遂寢二十四年
元旦日食疏請勤修省條上七事而尤以進賢退不肖爲國家治亂之源因劾
張蔭桓媚外人交近侍並以浙江學政徐致祥秩滿調安徽外似優隆內實屏
絕嚴旨下吏議敕還原衙門行走卒亂起秉衡出禦聯軍廷相從及敗尋秉衡
不遇還至倉頭橋赴河死子履豐拯之不及從之遇救免贈五品卿予世職賞
履豐主事

聶士成字功亭安徽合肥人初從袁甲三軍討捻補把總同治初改隸淮軍從
劉銘傳分援江浙閩皖累遷至副將東捻敗賜號力勇巴圖魯擢總兵西捻平
晉提督光緒十年法人據基隆率師渡臺灣屢戰卻敵還北洋統慶軍駐旅順

十七年海軍大閱禮成晉頭品秩調統蘆臺淮練諸軍擊熱河朝陽教匪禽斬其酋楊悅春賞黃馬褂易勇號曰巴圖隆阿明年授山西太原鎮總兵仍留蘆臺治軍請單騎巡邊歷東三省俄羅斯東境朝鮮八道圖其山川阨塞著東游紀程踰歲日韓亂起隨提督葉志超軍牙山聞高陞兵艦燬語志超曰海道梗牙山不可守公州背山面江勢便利從之士成迺先諸軍發次成歡遇伏迷失道吏士無人色士成見二鶴立岡阜語衆曰彼處無隱兵也遂出險往就志超志超已棄公州行追及之士成議趨平壤合大軍而鴻章檄令內渡以故平壤陷得免議志超逮問宋慶接統諸軍遣士成守虎山未幾銘軍潰諸軍皆走士成猶悉力以禦日軍大集力不支退扼大高嶺是時遼西危棘士成請奇兵出敵後截其餽道諸帥不從迺自率師偪雪裏站而陣除夕置酒飲將士預設伏以待日軍果來襲大敗之分水嶺斬日將富剛三造優詔褒勉授直隸提督和議成還駐蘆臺北洋創立武衛軍改所部三十營爲前軍與宋慶董福祥袁世凱並爲統帥慶福祥用舊法訓練世凱軍仿日式士成軍則半仿德式是爲武

衛四軍二十六年拳匪亂戕總兵楊福同命士成相機勦辦匪焚黃村邱坊鐵軌士成阻止之弗應擊殺數十人其黨大恨訴諸朝朝旨訶責士成時匪屬集天津可二萬遇武衛軍輒詬辱士成檢勒部下毋妄動榮祿慮激變馳書慰解之士成覆書曰匪害民必至害國身爲提督境有匪不能勦如職何迺鬱鬱駐楊村觀變會英法諸國聯軍至士成三分其軍一護鐵路一留蘆臺而自率兵守天津連奪陳家溝跑馬廠八里臺徑攻紫竹林喋血八晝夜敵來益衆燃毒烟礮我軍稍卻士成立橋上手刃退卒顧諸將曰此吾致命之所也踰此一步非夫矣遂殞於陣腸胃洞流詔賜卹閱二載以世凱言贈太子少保諡忠節建專祠

羅榮光湖南乾州人初隸曾國藩麾下補把總同治初李鴻章規三吳從西將華爾克青浦攻南橋鎮柘林直搗其巢大敗之乘勝復沙川金山濠守備又從西將戈登釋常昭圍以次下太倉崑山諸邑累擢參將攻常州先登城復遷副將賜號果勇巴圖魯除狼山鎮右營游擊蘇軍分援浙皖閩連克湖州長興廣

德漳州漳浦諸城與有功擢總兵六年東捻擾魯疆榮光以偏師游弋淮南北
敗捻於連東捻回竄江淮分寇海沭邳宿並擊退之明年西捻窺滑濬我師蹙
之榮光戰數挫而勇氣彌厲鴻章謀困之黃運間緣河築長壘榮光壁當敵衝
相持凡三閱月會霖雨寇多陷淖死榮光復蹙之東北勢益蹙張總愚自沈於
河事甯晉記名提督自是徙防金陵武昌西安凡二年移駐天津補大沽協副
將光緒七年創設水雷營遴各營將士演習兼授化電測量諸學既而北塘山
海關相繼設皆受成於榮光醇親王閱北洋軍以其教練有方薦授天津鎮總
兵位漸顯服食儉約若老兵然二十六年擢喀什噶爾提督未之官而拳亂起
八國兵艦入寇榮光守大沽礮臺大沽水深廣河道縈曲曲有臺備險奧外兵
懼其勢弗敢進榮光備益嚴迺佯就款使人言於裕祿謂第得四五艘入口護
僑商無他意裕祿許之榮光聞而大驚力阻而敵艦已踵入將及臺遽出礮仰
擊榮光再謁裕祿乞發戰令諜者已報臺燬榮光憤極歸拔刀殺眷屬曰毋令
辱外人手遂出赴難一僕隨之不知所終他日得其尸臺下僕尸亦在焉沒三

日而天津陷時年六十有七

壽山字眉峰袁氏漢軍正白旗人黑龍江駐防吉林將軍富明阿子以父任爲員外郎兼襲騎都尉世職遷郎中光緒二十年日軍犯奉天自請赴前敵充步隊統領弟永山領馬隊數與日軍戰復草河嶺克連山關進薄鳳凰城敵援至永山歿於陣壽山被重創以敢戰兼領鎮邊軍馬隊踰歲降敕褒嘉官軍既克海城壽山領七十騎詣遼南詞敵勢遇之湯岡子搏戰槍彈入右腹貫左臂出戰愈猛敵稍卻馳還壁血纒纒滿衣袴上嘉其勇遷知府賞花翎二十三年調充鎮邊軍左路統領徙駐黑龍江城越二年除知開封遺缺府未之官值東北邊防亟超改黑龍江副都統明年春入覲垂詢邊情甚悉命佐將軍恩澤治軍疏請增募十五營調諸邊事者十餘人躬詣上海購軍械自長崎海參崴伯利循海歸潛度形勢備戰守新軍成而恩澤卒於任朝命代之既莅事鏟奸弊明賞罰圖要塞手訂行陣操法頒之各將領使番上授以方略雖末弁亦接見籍記備器使二十六年夏拳亂作俄軍數千聲爲保護哈爾濱鐵軌紛集海蘭泡

乞假道壽山曰敵逼我都我假敵道如大義何拒之遂檄愛琿副都統鳳翔禦北路呼倫貝爾副都統依興阿禦西路通肯副都統慶祺禦東路令各嚴誠備毋浪戰並牒俄勿進兵愿負保路責而俄軍已分道進重以鐵路土工可十餘萬索值倡罷工揚言與俄爲難壽山亟下令軍中曰保鐵路護難民全陸訖違者殺無赦復使統領吉祥約富拉爾基監工蓋爾肖甫入城俾釋疑懼而蓋爾肖甫迺擊殺工人肖遁壽山猶強爲容忍也慎導俄民出境籍錄其財物備還然俄軍不爲止入寇愛琿及黑河屯華人被追赴水者屍蔽江下三姓呼倫貝爾又紛紛告警壽山亟電吉林將軍長順會攻哈爾濱然猶屬其語俄總監工謂若罷兵愿以全家質當是時諸路軍皆潰敗北路統領崇玉營官德春瑞昌西路統領保全東路營官保林並陷陣死於是俄遂偪齊齊哈爾省城旣而聞聯軍靖和迺遣同知程德全往商和議而自守軍覆則死之義命妻及子婦先裁手繕遺疏猶惓惓於墾政並致書俄將領屬勿戕民閱日具衣冠飲金臥柩中不死呼子西丹慶恩擊以槍不忍手頗機動彈出中左脅猶不死更呼材官

擊小腹仍不死呼益厲又擊之氣始絕先是詔責其開邊衅部議奪職後以總督徐世昌請復官予騎都尉兼雲騎尉世職附祀富明阿祠族孫瑞昌充此路營官俄陷黑河與統領崇玉同戰歿

鳳翔字集庭漢軍鑲黃旗人吉林駐防累官協領光緒二十一年中日事起將軍長順赴奉督師鳳翔任餽餉給食不乏尋擢愛琿副都統二十六年俄將固畢邁脫爾來假道壽山令愛琿誠備俄軍已自黑龍江下駛翼日俄官廓米薩爾名闊利士密德者浮軍艦至鳳翔遣軍拒之三道溝闊利士密德來謁申前請弗允賴怒去令舟師擊我而我師已先發殲其軍官二闊利士密德被重創奔還海蘭泡旋卒於是黑河軍與海蘭泡俄軍相轟擊者數日鳳翔令統領王仲良率騎旅三百渡江擊之始小挫繼獲大勝俄軍緣江遁師往馳之會其軍艦泊江岸載歸閱二日又渡江來擊卻之遲明又率步旅六千自五道河濟右路統領崇玉望見之其軍皆樹我幟衣我衣意爲漠河護礦兵也弗敢擊旣登岸始覺而勢已不可遏我師敗績崇玉殞於陣愛琿陷壽山聞之亟令鳳翔回

援弗及鳳翔駐兜溝子去愛琿七十里踰月俄軍復至槍彈雨下鳳翔以戰爲
守相持累日黑龍江行軍故無棚帳戰罷露宿衆苦寒以是軍有怨聲鳳翔慮
譁潰復以地勢平行難扼守迺請壽山結陣徐退抵內興安嶺軍焉去兜溝子
又百六十里未幾俄軍爭上嶺勢洶洶師失利仍扼嶺拒之敵攻益亟鳳翔悉
甲出令曰有後者斬而自赴前敵督攝有材官稍卻立使飛騎斬之材官懼大
呼陷陣俄軍少卻復進遂大敗署北路翼長恆玉斷一臂俄將卒死傷無算風
翔戰既酣右臂左足兩受彈傷墜馬者三轍復躍上鏖戰不少休旣還嘔血數
升而死事聞優卹如制崇玉通肯正藍旗佐領時同死事者玉慶黑龍江城世
管佐領城陷被執誓不絕口死最慘扎魯布黑龍江城水師四品官懷印以殉
死後猶手握印不可脫又段國英黃人以縣丞權鹽阿什河俄兵至令讓所
處屯兵嚴詞拒之縛而去旋釋歸則俄兵已佔其地且懸俄幟國英大哭曰中
國亡矣觸石頭裂死俄人觀者皆歎息

論曰秉衡清忠自矢受命危難大節凜然此不能以成敗論也聯軍之占津海

也長驅而入唯士成阻之俄兵之侵龍江也乘隙以進唯壽山拒之固知必不能敵晉以一死報耳榮光爭大沽鳳翔守愛琿雖已無救於大局而至死不屈外人亦爲之奪氣何其壯哉

清史稿

列傳二百五十五

崇綺

子傑初等

延茂

弟延芝

色普徵額

王懿榮

國元

宗室寶豐

宗室壽富

弟壽昌等

宋承庠

王國瑞

崇綺字文山阿魯特氏蒙古正藍旗人大學士賽尙阿子以穆后父貴升隸滿洲鑲黃旗初爲工部主事坐其父出師無功褫職咸豐四年粵寇謀犯畿輔充督練旗兵處文案事甯敘兵部七品筆帖式英吉利兵艦窺天津錄守內城功擢主事嗣遷員外郎同治三年將軍都興阿以崇綺諳兵事奏自隨兵部疏留是歲成一甲一名進士立國二百數十年滿蒙人試漢文獲授修撰者止崇綺一人士論榮之九年遷侍講出典河南鄉試充日講起居注官十一年詔冊其女爲皇后錫三等承恩公歷遷內閣學士戶部吏部侍郎光緒二年充會試副考官補鑲黃旗漢軍副都統會河南旱大吏匿不報爲言官所劾上命偕侍郎

邵亨豫按問廉得實巡撫李慶翔以下皆獲罪四年吉林駐防侍衛倭興額被盜誣控詔與侍郎馮譽驥往讞尋命崇綺署將軍專治之倭興額控如故事下侍郎志和覈獲得誣告狀崇綺自劾被宥五年出爲熱河都統御史孔憲穀疏稱其忠直宜留輔不許七年調盛京將軍九年謝病歸旋授戶部尙書再調戶部復乞休初穆宗崩孝哲皇后以身殉崇綺不自安故再引疾二十六年立溥儀爲大阿哥嗣穆宗迺起崇綺於家俾署翰林院掌院學士溥儀於是崇綺再出與徐桐比而言廢立甚得太后寵恩眷與桐埒義和團起朝貴崇奉者十之七八而崇綺亦信仰之事敗隨榮祿走保定居蓮池書院自縊死榮祿以聞賜奠醑入祀昭忠祠諡文節崇綺妻瓜爾佳氏先於京師陷時預掘深坑率子散秩大臣葆初及孫員外郎廉定筆帖式廉容廉密監生廉宏分別男女入坑生瘞閨門死難各獎卹有差二十七年命以曾孫法亮嗣廉定襲爵志鈞亦三等承恩公滿洲鑲黃旗人充散秩大臣聞警設醴祭先率妻子皆衣冠對縊於中堂卹如例諡貞愍

延茂杜氏內務府漢軍正白旗人同治二年進士銓禮部主事光緒八年歷遷至鴻臚寺少卿上言八旗官學廢弛宜變通章程再遷內閣侍讀學士中法構衅疏言我國士夫多懵外勢請自今慎選使才令其考察彼國政治利弊圖其山川夷險隨時奏聞又言名將必知地利而後可行師廟堂必知地利而後可馭將今宜北起盛京南踰嶺廣合臺瓊爲一氣復自滇粵邊外訖越南全境分繪兩圖更令諸疆臣各繪所轄地圖上測緯度下準方斜俾知相距里數爲軍事之上用上韙其議十三年除奉天府府丞越四年入爲大理寺少卿二十四年由駐藏辦事大臣擢吉林將軍以倉廩災上章自劾明年徵還再授黑龍江將軍未行而拳禍作聯軍入都偕弟延芝守安定門城陷闔室自焚死贈太子少保諡忠恪妻並諸姊妹女子子皆獲旌

色普徵額舒穆魯氏滿洲正白旗人咸豐十年賊竄畿疆以健銳營前鋒校從大學士瑞麟往討襄創力戰旋從僧格林沁勦捻斬馘甚衆同治初又從都統穆騰阿軍畿南光緒三年遷參領八年軍政課最授鎮紅旗漢軍副都統充神

機營專操大臣二十四年徙駐南苑二十六年擢寧夏將軍未行爭亂起命守正陽門晝夜徼循不少休聯軍攻城中礮死贈太子少保諡壯恪予騎都尉兼雲騎尉世職

王懿榮字正孺山東福山人祖兆琛山西巡撫父祖源四川成綿龍茂道懿榮少幼學不屑治經生藝以議敘銓戶部主事光緒六年成進士選庶吉士授編修益詳練經世之務數上書言事十二年父憂解職服闋出典河南鄉試二十年大考一等遷侍讀明年入直南書房署國子監祭酒會中東戰事起日軍據威海分陷榮城登州大震懿榮請歸練鄉團和議成還都特旨補祭酒越二年遭母憂終喪起故官蓋至是三爲祭酒矣前後凡七年諸生翕服二十六年聯軍入寇與侍郎李端遇同拜命充團練大臣懿榮面陳卒民不可恃當聯商民備守禦然事已不可爲七月聯軍攻東便門猶率勇拒之俄衆潰不復成軍迺歸語家人曰吾義不可苟生家人環膝泣勸厲斥之仰藥未即死題絕命詞壁上曰主憂臣辱主辱臣死於止知其所止此爲近之擲筆赴井死先是懿榮命

浚井或問之笑曰此吾之止水也至是果與妻謝氏寡媳張氏同殉焉諸生王杜松等感金瘞之事聞贈侍郎諡文敏懿榮泛涉書史嗜金石翁同龢潘祖蔭並稱其博學熙元直隸總督裕祿子光緒十五年進士由編修累遷至祭酒聯軍入方家居守制聞變偕嫂富察氏妻費莫氏仰藥以殉贈太常寺卿諡文貞越三年社松等以兩祭酒大節昭著籲請隆報襲得旨附祀監署唐韓愈祠

宗室寶豐字蘇年隸正藍旗好讀書有清尚光緒十五年進士選庶吉士授編修歷遷至侍講二十五年立溥儀爲大阿哥命直宏德殿並賞高廣恩四品京堂同授大阿哥讀明年兩宮西幸寶豐以隨扈不果憤甚誓死職自題絕命詞曰忠孝節廉本乎天性見利思義見危授命嗚呼寶豐不失其正飲金死贈太常寺卿

宗室壽富字伯弗隸正藍旗侍讀寶廷子泛覽羣籍尤諳周官禮太史公書旁逮外國史通算術工古文詩詞光緒十四年成進士選庶吉士嘗憤國勢不振八旗人才日衰著勸八旗官士文立知恥會大旨警頑傲厲以自強浙江巡撫

廖壽豐疏薦壽富才學堪大用命赴日本考政治既還著日本風土志四卷獻上召見痛陳中國積弊及所宜興宜革者漏三下始退上器之政變作遂杜門齋富性故矜貴不通刺朝列及拳亂起迺上書榮祿言董福祥軍宜託故令離畿甸然後解散拳民謂董爲禍根拳其枝葉耳榮祿不省妻翁內閣學士聯元旣以論拳匪誅家屬匿其宅衆以壽富重新學亦指爲袒外患甚或勸之他往曰吾宗親也甯有去理耶城陷壽富自題絕命詞並貽書同官曰國破家亡萬無生理乞赴行在力爲表明侍已死於此地雖講西學未嘗降敵遂與弟右翼宗室副管壽蕃及一妹一婢並投繯死贈侍講學士壽富刻苦孤峭實廷罷官早家貧甚性癖泉石壽富事父能委曲以適其意旨著有搏虎集

宋承庠字養初江蘇華亭人由拔貢考取小京官銓工部光緒四年舉於鄉遷主事八年充總理衙門章京遷員外郎轉御史二十六年巡視京城聯軍入造望城內火光燭天自言主辱臣死義無可逃疾書一紙遺家人曰宗廟宮寢已付一炬敵人殘忍不共戴天讀聖賢書惟有捐軀報國而已我得死所妻子勿

以我爲念時已仰藥口不能言越一日卒贈四品卿銜王鐵珊字伯唐安徽英山人光緒十五年進士銓兵部主事居久之母年老欲歸省會拳亂作知郿城必危遂不去悉舉貲斧寄母獨留百金復分其半助邑館貧不能歸者其人謂盍不偕南曰時勢至此不能出力抗敵已負朝廷若更引身遠辟何以爲人且在京爲大清官在籍踐大清土國苟不保家將焉屬其人知其隱蓄死志強之行不可兩宮旣西符遂伏案作書寄弟略云身非武職恨不能執干戈衛社稷官非臺諫又不獲效忠言維國是如郿城不保義不偷生所恨居官以來未能事母長負此不孝之罪耳書畢肅衣冠拜默坐室中聞內城陷自縊死遺書友人治後事謂某非死節不忍見國事敗壞耳事聞贈員外郎又追贈道員蔭一子入監讀書以知縣用

論曰國都旣陷主辱臣死此大義也崇綺久著清節終以一死自明延茂等見危授命義不苟生色普徵額等執干戈衛社稷死猶不瞑至今皆凜凜有生氣焉

清史稿

列傳二百五十六

恩銘

鳳字山陽

端方

字子初
直隸
懷柔人

列傳

松壽

趙爾豐

馮汝駉

陸鍾琦

字允吉
江蘇
崑山人

恩銘字新甫于庫里氏滿洲鎮白旗人錦州駐防以舉人納質爲知縣累至知府光緒十一年權知兗州晉道員二十一年改官山西二十六年署按察使率匪擾晉恩銘請巡撫毓賢陰護送教士出境弗聽兩宮西幸毓賢率師赴固關恩銘兼攝撫藩事車駕至太原召見奏對聲淚俱下補歸綏道先是口外七廳殺教士四十餘教民二千餘待撫者衆且亟到官後即發帑金倉粟濟之會聯軍至大同民駭走復令教士風諭並與執爭迺引兵去二十八年調直隸口北道時經拳亂後十三廳州縣教民洶洶圖報復宣化華教士且強逼民入教恩銘患之與西教士反覆辨論始允約束民教始安遷浙江鹽運使二十九年調兩淮管江蘇按察使辦鹽務如故杜私販恤煎丁歲增國課三十萬時論欲請

改場坑爲公司並創煤煎輪運議恩銘力陳其弊事迺寢授布政使錄山西協饒功晉頭品服三十二年署安徽巡撫修廣濟圩賑皖北水菑民德之紅蓮會匪自贖入燬建德教堂同時楚民寄居霍山者亦與教堂啟衅匪黨乘之勢漸熾恩銘分軍援剿並劾有司之釀禍者地方以靖是時廷議行新政銳意興警察於是承上指整頓巡警學堂適王之春薦道員徐錫麟才遂畀以會辦復念政劇財匱援例清丈緣江洲地按年收科墾牧與樹藝並舉朝旨又以民刑事訴訟法參用東西律下其議督撫恩銘慮皖北民悍爲擇其不便者六事具以報明年夏巡警學生卒業恩銘詣校試驗錫麟乘閒以鎗擊之被重創知縣陸永頤銳身救護先殞錫麟令經歷顧松閉校門不從亦斃之從者負恩銘還署遂卒事卹贈太子少保諡忠愍予皖省建祠賞騎都尉兼一雲騎尉世職子咸麟襲恩銘既死錫麟亦被獲錫麟者浙江山陰人就學日本以貲爲道員志在謀縮軍隊便起事倉卒發難卒被禽慘閱數年復有孚琦鳳山被刺事孚琦字樸孫西林覺羅氏隸滿洲正藍旗以工部筆帖式充軍機章京累官郎中三遷

至內閣學士光緒二十八年授刑部右侍郎三十二年出爲廣州副都統頗以興學爲己任嘗設八旗工藝學校整麗中小各學堂明年權將軍將軍事故簡孚琦慮卽偷惰日必讀書臨池暇輒躬執勞役宣統二年再攝將軍篆明年春赴城東燕塘勘旗地兼閱試演軍用飛機有溫生才者隸革命黨事暗殺會日將暮伏道左俟其至轟擊之遂殞命生才被執論棄市事聞上閱惻愴愍命鳳山代之鳳山字禹門劉氏隸漢軍鎮白旗以繙譯舉人襲佐領充驍騎營翼長印務章京累遷參領總辦東安巡捕分局聯軍入京法人在其轄境刃傷商民縛致總局請毋少貸論如律擢副都統訓練近畿陸軍著聲績除西安將軍仍留治兵事宜統初改練軍歸部節度始解兵柄三年授廣州將軍未行而武昌事起香港爲粵民黨藪謀攻省城衆阻其勿往日吾大臣也不可不奉詔遂毅然去將至時總督及布按以下官皆不敢出迓或勸宜微服先入城毋蹈孚將軍覆轍鳳山不可日午輿衛導行抵南城外黨人匿市廛簷際擲炸彈屋瓦摧壓從者死十餘人街石寸寸裂暮得鳳山屍焦爛無完膚事聞贈太子少保

諡勤節予騎都尉世職

端方字午橋托忒克氏滿洲正白旗人由蔭生中舉入貢爲員外郎遷郎中光緒二十四年出爲直隸朔昌道京師創設農工商局徵還筦局務賞三品卿銜上勸善歌稱旨除陝西按察使晉布政使護巡撫兩宮西幸迎駕設行在調河南布政使擢湖北巡撫二十八年攝湖廣總督三十年調江蘇攝兩江總督尋調湖南顯志興學貲遣出洋學生甚衆逾歲召入覲擢閩浙總督未之官詔赴東西各國考政治既還成歐美政治要義獻上議改立憲自此始三十二年移督兩江設學堂辦警察造兵艦練陸軍定長江巡緝章程聲聞益著宣統改元調直隸隆裕太后梓宮奉安端方乘輿橫衝神路農工商部左丞李國杰劾之坐違制免既而御史胡思敬又彈其貪橫凡十罪事下張人駿覆奏入以不治崖檢被訶斥因已罷官貲勿問三年命以侍郎督辦川漢粵漢鐵路時部議路歸國有而收路章程湘川不一致川人大譁川鄂爲黨人所萃乘機輾發端方行次漢口岑春煊方授川督端方力詆之命率師往按尋詔代攝其事所過

州縣輒召父老宣諭威德至資州所部鄂軍皆變軍官劉怡鳳率衆入室語不遜端方以不屈遇害端方性通脫不拘小節篤嗜金石書畫尤好客建節江鄂燕集無虛日一時文采幾上希畢阮云弟端錦字叔綱河南知府赴東西各國考路政著日本鐵道紀要從兄入川變作以身蔽其兄極口贊軍士無良同被殺事聞贈端方太子太保諡忠敏端錦諡忠惠其時轉饒官劉燧荊州駐防舉人都司赫成額並赴水死

松壽字鶴齡滿洲正白旗人以蔭生官工部筆帖式累遷郎中出爲陝西督糧道光緒二十一年晉山東按察使明年調江西晉江甯布政使二十四年擢江西巡撫越三載移撫江蘇歷河南加尙書銜所莅皆稱職二十八年召爲工部右侍郎兼正藍旗蒙古副都統尋授熱河都統疏陳續修礦章四條允行復以地控蒙部號難治條上吏治軍政興學理財方略甚悉又召還拜兵部尙書明年調工部又明年出爲察哈爾都統三十三年授閩浙總督居官垂二十年不務赫赫名然律己以廉臨下以寬爲時論所美宣統三年秋鄂湘江浙新軍踵

變閩軍乘之將舉事使人要松壽令繳駐防營軍械斥之遂決戰初獲勝繼迺大挫憤甚飲金以殉事聞贈太子少保予二等輕車都尉世職諡忠節

趙爾豐字季和漢軍正藍旗人父文穎見忠義傳爾豐以鹽大使改知縣選山西靜樂縣永濟清獄治盜匪絕跡躬捕蝗始免災擢河東監掣同知護河東道以憂去二十六年聯軍入晉邊山西巡撫錫良檄總營務處嚴防密偵以策退之錫良遷河道總督調委河工累保道員復從至熱河錫良督川疏薦其才權永甯道時會匪爲患爾豐受任即親山巡勦凡八閱月誅巨匪百餘人民始安業三十一年駐藏大臣鳳全被害於巴塘錫良以爾豐爲建昌道會提督馬維騏往討維騏軍先發爾豐從之遂克巴塘爾豐接辦善後移兵討鄉城匪退喇嘛寺據碕死守爾豐斷水道圍攻番衆悉降於是爾豐建籌邊議錫良以聞加爾豐侍郎充川滇邊務大臣爾豐會錫良暨雲貴總督丁振鐸奏陳改流設官練兵招墾開礦修路通商興學諸端廷議准撥開邊費銀百萬兩三十三年錫良移任去爾豐護四川總督於是遙策邊事凡前所奏陳皆以次舉察吏尤嚴

多所舉劾僚屬肅然川南邊地多匪移興文縣於建武移永寧縣於古蘭時外人議輸運入川爾豐令川商自辦淺水輪以阻之是爲川江駛輪之始三十四年以爾豐兄爾巽督川改爾豐駐藏大臣仍兼邊務專邊藏事爾豐以經營全藏宜以殖民爲主特慮恩信未孚藏人疑阻請仍責駐藏大臣聯豫駐守而自巡視邊藏先以巴塘爲根據寓遷民於兵墾漸及藏地又與爾巽會奏設安康道改打箭爐爲康定府設河口縣裏化廳同知稻成縣貢噶嶺縣丞巴安府三壩廳通判定鄉縣鹽井縣詔促爾豐出關因就成都駐防旗兵中選練西軍三營自隨藏人聞之衆兵三崖以阻爾豐至打箭爐適德格土司爭襲構亂乃請旨往辦迭敗之贈科麻木追奔至卡納沙漠地衆悉降爾豐分其地爲五區設登科府德化白玉兩州石渠普同兩縣置邊北道德格地大包有春科高日兩土司遂與靈蕙土司之郎吉嶺等地並改歸流宣統元年朝意務懷柔藏人采爾巽議以經營西藏責聯豫督辦溫宗堯改爾豐專任邊務駐巴塘爲藏聲援剿察木多乍了歸邊轄川軍協統鍾穎率新軍三千入藏被困察木多爾豐

聞報立馳往援鍾穎軍出並驅勦類伍齊碩般多洛隆宗邊壤各部落逆番殆盡三十九族波密八宿等部咸納款而江卡藏兵忽抄邊軍後路犯巴塘爾豐分兵擊敗之乘勢收江卡貢覺桑昂雜瑜四部落於是爾豐軍越丹達山而西直抵江達距藏都拉薩僅六日程矣二年達賴喇嘛聞川軍將至逃入英屬印度爾豐請乘勝一舉平藏革教易俗廷意不欲開釁阻之爾豐上疏力爭略言我國幅幘遼闊強鄰環伺屬地多有侵佔自革達賴喇嘛阿旺郎結叛逆不惟藏人搖動卽外人覬覦之心亦因而愈熾今我兵雖已入藏然阿旺郎結已入英手英人必挾以圖藏若再姑容將成大患臣因一面由巴塘進兵攻破南墩一面由察木多進兵貢覺桑昂曲宗我兵所到番人親附卽洛隆宗碩板多等亦皆遠來輸誠備陳藏中苛虐情形堅懇內屬臣初意務在保境息民並無開疆拓土之念唯桑昂曲宗屬地雜瑜與獮獯野番接壤時有英人潛伏獮獯之南爲阿撤密西爲波密英人若得雜瑜卽可直接波密由上布入藏與印度聯成一片則波密不可不收入版圖其勢至迫請及此將邊兵所到之地概收歸

邊並兩商聯豫以烏蘇里江以東隸邊以西屬藏疏入樞府以外交責言爲慮
聯豫亦不允劃界然邊軍所得江達以內地爾豐已逐漸改流早成轄境矣爾
豐巡視各地經責覺乍了江卡三部落羣以討三崖爲請三崖者野番也地險
人悍三部落苦其侵掠嘗合攻之反爲所敗官軍久不能討爾豐策三崖四周
皆已改流必爲我用遂派知府傅嵩林率兵五路進攻苦戰兩月盡克上中下
三崖全境設官治之初藏人占瞻對爾豐屢請收回廷議責聯豫議贖久不得
要領至是邊地略定獨瞻對爲藏有梗塞其中爾豐乃決以策取之三年爾豐
調署四川總督因薦嵩林以道員用代理邊務大臣同行閱邊繞道北路先至
孔撒麻書設甘孜委員靈葱白利倬倭東科單東魚科各土司繳印改流并受
色達及上羅科野番降瞻對民皆聞風請附爾豐乃檄番官曰瞻對原係川屬
朝廷前以賞藏設官征糧光緒二十年瞻人叛藏則藏已失瞻川兵取瞻則瞻
爲川有乃藏人久占不歸迄今又十餘年矣厚歛橫征民不堪命應將瞻對仍
獻朝廷以表恭順藏官畏爾豐威獻戶籍去瞻對民歡呼出迎爾豐遂入瞻對

設官治之野番俄落色達均望風降又波密自言其先爲入藏漢兵別成部落爾豐前至察木多波密呈驗所產棉布糧食證明確由漢出并述其地與白馬崗接壤在英藏間力請內附及爾豐師還聯豫忽遣兵攻之大敗乞援至是爾豐派鳳山由巴塘率邊兵二千往與聯豫參贊羅長椅軍共克波密并取白馬崗爾豐至打箭爐收明正土司地及魚通冷邊沈邊咱里等土司印皆改流計爾豐所收邊地東西三千餘里南北四千餘里設治者三十餘區詳土司傳會川亂起爾豐還省初商辦川漢鐵路公司集股銀二千餘萬忽奉旨收歸國有咸大譁倡保路同志會好事者爭附和勢張甚爾豐至成都察亂已成思弭解集司道聯名電奏請變更收路辦法不允商民罷市同志會捧德宗神牌衝入督署與護兵相持頗有死傷全省騷動廷寄飭肇禍首正法爾豐不得已捕會首蒲殿俊等九人拘之其黨圍攻省城兵皆川產不用命督辦川漢鐵路大臣端方奉命援川滯重慶劾爾豐操切詔仍回邊務大臣以岑春煊代爲總督武昌變作春煊阻不得往端方至資州遇害資政院劾爾豐罷黜待罪而朝旨

已不能達川重慶兵變會匪繼起軍民環請獨立爾豐遽讓政權於殿俊殿俊自稱都督防軍復變殿俊走匿全城無主商民請爾豐出定亂因揭示撫輯變兵而標統尹昌衡率部入城自爲都督羅綸副之以兵攻督署擁爾豐至貢院爾豐罵不絕口遂被害

馮汝駉字星巖河南祥符人光緒九年進士選庶吉士散館授戶部主事充軍機章京累遷郎中出知四川順慶府遭母憂去服闋起山東青州知府調直隸大名三十一年遷湖北鹽法道明年調安徽徽甯池太道遷甘肅按察使未幾晉陝西布政使擢浙江巡撫三十四年移撫江西整稅務省不急官稱治辦朝議方厲行新政迺復察民情量財力從容施設士民安之宣統元年御史江春霖上其溺職徇私狀事下安徽巡撫朱家寶嚴覆得白坐疏忽干吏議奪俸三月三年武昌變起下游皆震南昌軍相應和魯汝駉爲都督號獨立岐拒之贛人故感其賢導之出至九江迺仰藥以殉詔旨軫惜諡忠愍

陸鍾琦字申甫順天宛平人本籍浙江蕭山父春榮績學不遇祭酒盛昱其弟

子也鍾琦少劬學以孝稱光緒十五年進士以編修辦直隸賑災徐桐亟賞之
拳禍起桐惑焉鍾琦持異議弗聽聯軍入同年王懿榮熙元寶豐輩先後皆殉
節鍾琦聞之泣閭戶自經遇救獲免二十九年除江蘇督糧道越五載遷江西
按察使調湖南察吏嚴定州縣結案功過章條月計勘案數與其鞫訊狀限期
報司繇是獄鮮積滯再移江蘇多平反宣統改元督布政使三年擢山西巡撫
到官未踰月而武昌難作鍾琦語次子敬熙曰大事不可爲矣省垣倘不測吾
誓死職汝曹讀書明大義屆期毋效婦仁害我又曰生死之事父子不相強任
汝曹自爲之但吾孫毋使同盡以斬宗祀敬熙知父意決入告母母曰汝父殉
國吾惟從之而已敬熙以事亟赴京語其兄光熙偕還晉鍾琦馭新軍嚴至是
調兩營赴南路時九月七日也夜發饗將以翼日行而遲明變作新軍突入撫
署鍾琦出堂皇僕李慶雲從蹙之弗去且挺身出先被戕鍾琦叱曰爾輩將反
邪語未竟遽中鎗而殞光熙奔救亦被擊死叛軍入內室其妻唐氏抱雛孫起
並遇害詔褒其忠孝節義萃於一門予諡文烈妻唐旌表光熙本名惠熙字亮

臣少從盛昱游厲學鍾琦邁危疾嘗刲股和藥以進光緒三十年成進士選庶吉士東渡日本學陸軍卒業歸授編修擢侍講贈三品京堂諡文節

論曰恩銘遇刺實在辛亥之前蓋亂機已久兆矣武昌變起各行省大吏惴惴自危皆罔知所措其死封疆者唯松壽鍾琦等數人或慷慨捐軀或從容就義示天下以大節垂絕綱常庶幾恃以復振焉

清史稿

列傳二百五十七

志銳

字烈侯

良弼

宗室載穆

字真源

文瑞

承襲

恒齡

字海亭

樸壽

謝寶勝

字鴻聖

黃忠浩

字廣和

志銳字公穎他塔拉氏世居扎庫木隸滿洲正紅旗陝甘總督裕泰子父長敬
 四川綏定府知府志銳幼穎異光緒六年成進士選庶吉士授編修與黃體芳
 盛昱輩相厲以風節數上書言事累遷詹事擢禮部右侍郎中東事起上疏畫
 戰守策累萬言虛陪都警自請募勇設防稱旨命赴熱河練兵未踰月以其妹
 瑾珍兩妃貶貴人降授烏里雅蘇臺參贊大臣釋兵柄遂迂道出張家口策馬
 踰天山西絕幕所巡臺站輒周咨山川風俗宗教著詩記事居數年將軍長庚
 令赴邊外釐中俄積案凡六閱月結千餘起前後五上疏籌西北防務發強隣
 狡謀中當軸忌左遷索倫領隊大臣領隊例不得專摺奏事居則鉤稽地形隄

塞出則徵循鄂博卡倫冀得當以報又數年改授甯夏副都統疏請發帑二十萬溶城外故渠獲沃壤數千頃頻上疏多言人所不敢言宣統二年遷杭州將軍明年調伊犁將軍加尙書銜入覲條上弭邊患禦外侮機宜甚悉又力陳新政多糜費請省罷壹意練兵救危局並請邊地練兵費百萬部議止予二十萬抵新疆聞武昌變或勸少留不可踰月到官日討軍士而申儆之已蘭州軍譁變甯夏繼之伊犁協統楊纘緒以兵叛夜據南北軍器庫攻將軍署羣議舉志銳爲都督峻拒之迫詣商會亦弗從起發鎗擊之遂遇害其僕呂順奔走營棺歛撫尸號慟亦爲叛軍所戕又武巡捕官劉從德四川人教練官春勳京旗人並及於難事聞贈志銳太子少保諡文貞志銳夙負奇氣守邊庭踰十稔自號爲窮塞主工詩詞熟察邊情懼禍至無日其赴伊犁也以手書徧告戚友言以身許國不作生入玉門想其致命遂志蓋已定於拜疏出國門日云

良弼字寶臣紅帶子隸鑲黃旗大學士伊里布孫少孤事母孝劬學留學日本陸軍學校畢業歸入練兵處歷陸軍部軍學司監督副使補司長時新設禁衛

軍任第一協統領兼鑲白旗都統遷軍諮府軍諮使平日以知兵名改軍制練新軍立軍學良弼皆主其謀尤留意人才自將師以至軍士莫不延納思所有建樹頗爲時忌武昌亂起各省響應朝論紛呶王公貴人皆氣餒莫知所爲良弼獨與三數才傑朝夕規畫外聯羣帥內安當國思以立憲弭革命圖救大局上下皆恃以爲重時袁世凱來京方議國體人心不安甚矣一日良弼議事歸及門有人遽擲炸彈三日而卒事聞震悼優卹如例其後官紳請立祠於北京祀之良弼剛果有骨氣頗自負雖參軍務無可與謀常以不得行其志爲恨日有憂色及遇刺醫初謂可療忽有進以酒者遂死死未旬日而遜位詔下時皆悼之

宗室載穆字敬修隸滿洲鑲藍旗伯勤郡王允禔五世孫祖綿翔鎮國將軍父弈雲一等侍衛記名副都統載穆年二十除三等侍衛累遷頭等兼辦事章京以忤直忤上官意數歲不遷光緒二十六年拳亂起兩宮西幸痛哭自盡者再遇救獲免三十二年授太原城守尉明年有詔遞裁駐防分遣歸農迺倡農桑

勸女工興學校比去晉旗民男婦務耕作嫻織紵者達二百人省城門有八舊
閉其二阜城門當汾水衝河決土壘不能通車馬羣議閉之載穆曰此汾西數
十村入城孔道也請於舊門南闢新門民稱便秩滿將入覲巡撫丁寶楨疏留
之報可宣統三年簡京口副都統鄂難作緣江戒嚴載穆繕城郭犒軍士設練
兵處定營防城守章條晝夜徼循旗漢民雜居者皆按堵已而新軍徒頓鐵道
旁運槍械者緝屬載穆知有異遣使如江甯告急弗應江蘇巡撫程德全號獨
立傳檄鎮江防營迺潛通蘇軍全城益怖懼於是官紳集議定滿漢聯合策約
毋戰且要旗營繳軍械載穆知事不可爲罷會大慟語左右曰吾上負朝廷所
欠止一死耳左右環跽請繫衆心維危局翼日鎮紳楊邦彥詣軍門趣繳械不
許會新軍入據漢城旗營大譁迺進旗衆而語之曰駐防兵單糧儲竭吾戰死
甘如飴顧糜吾民肝腦膏鋒刃吾奚忍若曹其徇衆議紓急禍吾身爲大臣且
天潢親也宜効死是時驍騎校萬選力爭請毋止戰不見用頓足大哭印班德
需亦憤甚曰大局休矣吾甯死以報國載穆嘿不語迺繕遺疏手自緘印遣佐

領良才登至京師復草遺書致商會猶殷殷以七千人生命相屬隨行四僕皆遺歸有李順者去復返朝夕待其側偶退休詰朝入寢室則已自經死矣郡人哀之殯斂如禮且爲置田安厝焉將軍鐵良上聞命數覆死事江甯失鐵良走宗人府亦無奏報故褒贈之典弗及云萬選德需並殉先是驍騎校同源以旗人將失所忍死爭旗產至是迺語家人曰吾可以從殉國諸公後矣沐浴整衣冠不食而死萬選字子昭蒙古敖漢氏著有易注筆諫金石賞心火龍攻戰略諸書德需字雨田同源字子清並蒙古人

文瑞鉏祜祿氏滿洲鑲紅旗人世襲男爵充頭等侍衛出爲馬蘭鎮總兵中日之役喜峰口迫近戰地策守禦遏內匪轄境以甯坐陵樹蟲災免頃之被宥除歸化城副都統兼署綏遠將軍拳匪亂延蒙旗蔓教案紛糾文瑞至與外人推誠商榷償款獨輕緩民德之調青州念旅民乏生計爲闢工廠興學校編制軍隊滿城一切皆治辦移成都未之官擢西安將軍興學勸工爲治復放青州議辦移墾授田法未及行而鄂變作西安新軍應之先據漢城緣塗縱火烟燄張

天疾趨南街遇新軍前騶戈什哈數人被擊死紆道歸與左翼副都統承燕右翼副都統克蒙額籌應變策遣軍士晝陴而守兩軍合戰自申及亥不少休翼日昧爽新軍分攻東南門旗兵多傷亡文瑞督攝益力未幾新軍請停戰會議遣協領葆鈞往迄未得要領復貽書新軍反覆開諭亦不答而新軍又兩路夾攻旗營火器竭漸不支日方午東門破進滿城終夕巷戰旗兵死者二千餘人餘皆屠殺麾下壯士從者十餘及其子熙麟而已於是環請引避圖恢復文瑞愾然曰吾爲統兵大員有職守不能戡亂重負君恩惟有死耳適口授遺疏趣熙麟書之命乘間達京師而自從容整衣冠赴井死幕僚秦鶴鳴飲之承燕同時投井死克蒙額字哲臣滿洲鑲藍旗人先請巡撫發新式軍械遲不應激戰三晝夜力竭陣亡

恆齡字錫九舒穆魯氏滿洲正藍旗人武勳王楊古利後裔少嗜學嫻武幹尤熟中外兵家言以附生官筆帖式遷驍騎校累擢佐領旗營久習竊情罕知兵事迺創編新軍設講武堂教之拳匪亂作湘人旅荊者被煽動燔沙市燬船及

稅關領事署外國僑民多逃避勢岌岌恆齡率二百人往鎮撫誅首要宥脅從外人避難者護持之事軍政課最將軍綽哈布疏綜營務恆齡條上四事曰設警察興學校釐財政練常備軍並奏行設八旗高等學堂陸軍小學堂俾任校事顧其時風氣闇陋款無所出遂走謁總督張之洞面陳規畫獲助萬金始成立猶不足省新軍陋規益之歲以爲常於是訂章條甄材穎走書幣聘海內名儒分科教授校風肅然學部曹司攷察稱荊州第一旋領振威新軍調督練處參議總辦陸軍小學將軍恩存總督陳夔龍交章論薦宣統改元調充熱河練軍統領汰老弱補闕額中嚴紀律凡兩閱月獲匪首葛蘭亭等推功將校二年授寧夏副都統朝陽紳民籲留夔龍上聞廷議以西陲邊要趣到官既莅事首嚴烟禁開渠屯田久無效設方略整飭之三年遭父憂令甲旅員百日服除卽視事恆齡固請終制解職去奉父喪於萬縣抵宜昌鄂亂作道塗阻絕將軍連魁疏請參軍事上命署荊州左翼副都統恆齡援墨經從戎義愾然任城守而援絕餵饑兵人疲饑則譁變迺斥家財餵之流泣誓衆令毋擾沙市啟外衅

時方患癘劇裏創策騎出晝夜徼循血痕猶濡縷然無何事益亟外城失恆齡晨起公服端坐堂上發手槍洞胸而殞家人得其與弟恆廣子裕文書曰吾家世受國恩宜竭力圖報今城既失義當死所憾者老母在堂忠孝不獲兩全第吾母有子能盡忠亦甚得我死汝曹能闔門殉節固善否則善事吾母以補吾不孝之罪母以吾死狀令老人知也恆齡死數日連魁與右翼副都統松鶴開門納民軍荊州遂失事聞上震悼諡壯節參謀長德需自經死恩需亦自經家人救之憤不欲生後數日卒

樸壽字仁山滿洲鎮黃旗人光緒二十年舉人吏部主事累遷郎中拳亂起聯軍入城首與各國謀保商民出爲山西歸綏道簡庫倫辦事大臣三十二年召授鑲藍旗滿洲副都統遷正黃旗漢軍部統明年除福州將軍整旗務嚴烟禁專志訓練得精卒四千人宣統三年省城民軍起率防軍與搏火器猛利民軍幾不支然民軍雖被創輒隨時募集防軍以猛鬪故傷亡多卒敗潰樸壽被執受挫辱不屈遂支解之棄尸山下其死狀爲最烈云事聞贈太子太保子二等

輕車都尉世職諡忠肅

謝寶勝字子蘭安徽壽州人初隸金順麾下從征西陲嗣隨宋慶馬玉崑克肅州及關外諸城積勛至都司以事與玉崑左乘冠服走博克達山爲黃冠光緒十五年玉崑提督畿輔鳩集舊部獨偉視寶勝招之出敦促備至寶勝愾然曰玉崑知我者義不忍卻迺棄黃冠詣軍所獻方略二十一年朝鮮告警從出關與日軍數十戰勇敢躡倫等玉崑弟陷重圍銳身救之出和議成憤甚復爲道士裝羈跡京師白雲觀如是者數年拳亂作柴洪山統武衛護軍榮祿檄領前路後營已留河南更名精銳軍領左營尋筦豫北軍忌者中以蜚語巡撫吳重熹疏辨其冤上卒優容之駐軍河陝汝最久將士積相畏服軍麾所指紀律肅然累遷至副將宣統改元授河北鎮總兵明年移南陽河陝汝軍仍受節度寶勝益感奮尤嚴治盜所莅毋擾民恆短衣執械先士卒或宵行數十百里僞爲小商調虛實村民通匪者憚其至嘗置毒飲水處寶勝則自攜水盥懷麥餅食盡忍飢渴以爲常以是寇鮮漏網洛陽張黑子嵩縣王天縱汝州董萬川尤爲

悍張董並計禽之天縱懼不敢出豫西數十州縣皆按堵而南陽王八老虎猶
岫負寶勝至移書期決鬪會天大雪前期五日潛師薄其巢賊不誠據中庭轟
拒寶勝奮身入衆繼之火其廬卒就縛寘之法自是南陽無遺寇寶勝短軀幹
目光炯炯能懾人視盜如仇待士卒若子弟勞無愆賞遇喪亡賻卹尤厚餉饋
無所受無兼衣餘食統兵十餘年而負責鉅萬巡撫寶棻上聞中旨敕司庫償
九千餘金異數也三年移師嵩縣值鄂亂作亟還籌戰守其時襄樊已應和土
寇處處颺起豫南與陝鄂壤地接市言訛誠日數至檢勅部曲日夕巡徼不少
休支振數十日而襄樊軍闌入士民與通欵將內訌諸將意沮咸莫能奮惟都
司姚嵩雲慷慨願從戰無何新野陷大吏飛檄戒毋妄動寶勝憤激赴校場與
衆誓死守而府縣官已委印綬去翌日元旦獨朝服詣萬壽宮行禮痛哭不能
止俄傳南軍入烟燄翳天各營亦以食盡而潰不得已退頓裕州比至城皆樹
白幟矣迺止舍至夕而遜位詔至召將卒厲以忠義麾之去夜半時屏僕從肅
衣冠嘔血數升以槍自擊死平旦將卒趨視皆哭失聲以大纛裹屍舁至獨頭

鎮欽之竊雲陝西人舊爲多隆阿部將後從寶勝軍隸營務處亦爲民軍所戕云

黃忠浩字澤生湖南黔陽人通經術嗜讀儒先性理書以優貢生入貲爲內閣中書主沅州講席銳意地方利弊建西路師範學堂勸民植桑育蠶尤顯志鑛業陳寶箴趙爾巽先後撫湘設鑛局及公司採平江金鑛常育水口山鉛鑛至今稱厚利皆其謀也光緒二十一年以東事籌防募鄉勇五百人入鄂守田家鎮礮臺總督張之洞一見重之調領武靖營駐洪山二十三年治軍長沙統毅安軍軍故征苗舊旅日久竊敵不可用寶箴納其議別募威字新軍俾主之二十六年之洞檄募師勦王二十八年徙駐岳州緝新隄土寇平之再入貲爲道員赴日本參觀大操歸益詳練戰術知兵名大著明年爾巽檄綜湖南營務處統忠字旗五營其冬母憂去職踰歲廣西降匪陸亞發陷柳州湘邊大震起忠浩率所部援桂直搗梅寨用少擊衆寇大創降敕褒嘉寇奔福祿村村故猛地箐壑深岫中有危壁垂縋縷容一人行忠浩迺短衣芒屨徒步深入會天酷暑

鬱爲瘡痍兵士死相繼忠浩亦遘膨疾然治軍勤如故寇卒不敢近捷上授狼
山鎮總兵請終制改署任道員授總戎特例也是時岑春煊駐桂林檄與議軍
事奏署右江鎮服閔子質授未幾乞假去再至湖北爾巽留綜營務處兼統全
省防軍荆襄水師受節度宣統二年從爾巽入川署提督乞歸三年京師開全
國教育會忠浩與焉爭鐵路國有爲非計議大溶洞庭湖紓湘蓄議論侃侃無
所撓還長沙值巡撫余誠格新莅官黨人謀日亟誠格慮新軍有異志以中路
巡防十營屬之不就誠格下席揖請至再不獲已始受事甫三日鄂亂起九月
朔新軍變將入城協統蕭良臣遁防軍爲內應忠浩方晨謁隨誠格出撫諭至
再勢洶洶不可遏要誠格爲都督誠格從問道出召水師水師亦變誠格投江
左右援之不得死忠浩猶留署火起護弁強之出及門遇亂兵被執脅降不從
刼之走刃傷臂及股至小吳門城樓遂遇害家人奉喪歸葬緣塗設奠者數百
里繼忠浩死者有楊讓梨讓梨字邵欽籍湘鄉少與王彥子詩正讓梨與友善
詩正援臺灣戰失利嘗負之以免軍中咸壯之積助至守備轉戰新疆河州西

甯數有功累擢參將賜號鏗色巴圖魯既還長沙隸忠浩麾下宣統二年補鎮
筭嶺標中軍游擊明年武漢事起忠浩電調援長沙次辰州聞省城亂迺阮辰
龍關誓死守筭兵故悍銳爲民軍所憚時總兵周瑞龍持兩端其子瓚齎金至
將以餌筭兵哨弁李鳳鳴潛告讓梨得爲備瑞龍稱疾檄讓梨還代以他將讓
梨迺上書責以大義滅親辭激昂且傳檄捕瓚瓚遁已而瑞龍降道府官委印
綬去讓梨痛哭犒遣軍士獨權小舟至清浪灘躡身入水舟子泅出之讓梨恚
甚曰奚活我爲瓚出代其軍遣人追繫讓梨及其子傳孔鑠送長沙巡常德遇
龍璋巡按西路勸之不屈遂斬之臨刑蕭衣冠北嚮拜觀者萬餘人皆泣下傳
孔釋還有陳其者讓梨從子壻也當讓梨被縛時其即奮起擊縛者仆一人攢
刃交下傷其首斷一足並死之

論曰辛亥之變各省新軍既先發難防營不能獨支而京外旂兵久無軍備又
多被殘困死行陣者自家室可數志鈞等權輕勢孤艱難楮柱思以一隅挽全
局及事不可爲乃以死報志節皎然可敬亦可哀矣

清史稿

列傳二百五十八

盛宣懷

瑞澂

盛宣懷字杏蓀江蘇武進人以諸生納貲爲主事改官直隸州知州累至道員
營贊置輪船招商局開採湖北煤鐵礦李鴻章頗信任之英商擅築鐵軌首滬
巡寶山訖吳淞上海道數阻弗聽宣懷與英官梅輝立折辯償銀二十八萬有
奇始歸於我光緒五年署天津道時鴻章督畿輔方嚮新政以鐵路電報事專
屬宣懷宣懷以英丹所設水陸綫漸侵內地迺集貲設津滬陸綫建電報學堂
並援萬國公例與爭始克嚴定條款會訂水綫相接合同於是與輪船招商同
爲商辦兩大局八年英法德美議立萬國電報公司增造自滬至香港水綫壟
利權宣懷復勸集華商自設緣海各口陸綫以絕覬覦十年署天津海關道會
法越構毀海防急迺移金州礦貲治蘇浙閩粵電綫便軍事而部議指爲含混
科以降級調用左宗棠爲言於上事下南洋大臣曾國荃等上其績狀始改留
任十二年授山東登萊青道法領事林椿詣煙臺與訂越南北圻綫約朝旨旣

報可矣而張之洞執言不可行宣懷曰今瓊春海蘭泡欲接俄綫俄方有挾求法既許接綫彼必易就範且英丹皆與約奚拒法總署然之果不數年而俄約成十八年除真滬上織布局廠災宣懷籌設華盛總廠復任彌漢冶鐵廠虧耗於是之洞賞其才與王文韶交薦之遂擢四品京堂督辦鐵路總公司入覲奏言築路與練兵理財育才互爲用並請開銀行設達成館稱旨補太常寺少卿與比訂貸款草約二十四年詔趣造粵漢路宣懷建議貸美款歸自辦具改歸商辦本末以上而言者盛毀其所爲遲滯被訶責宣懷具報曲折上乃慰而勉之宣懷自請解職仍留京會議洋貨稅則已而徐桐劾兩局有中飽適剛毅按事南下銜命察覆宣懷具以實對奏上被溫旨二十六年拳禍作各國兵艦紛集江海各口宣懷倡互保護電粵江鄂閩諸疆吏獲同意遂與各領事訂定辦法九條世所稱東南保護約款是也又電奏請下密詔平亂發國電書懲禍首卹五忠所言動關大計事甯加太子少保除宗人府府丞明年充辦商稅事務大臣以和約既成償費過鉅迺奏豫籌四策而注重加稅復以借款稱息

負累劇請婉商各國分攤免息嗣與各國商加稅免釐議垂成英忽中海厥後宣懷數續議仍無效是歲奏設勘礦總公司越二年而有爭粵漢廢約事滬甯蘇杭甬踵之衆大譁詔禁宣懷干預命唐紹儀代督兩局宣懷遂奏罷鐵路總公司後四年浙路事益棘上終以宣懷諳路政復召見問籌策宣懷言既借款不應令商造既商造不應再借款民情可用不順用之恐激變上是之拜郵傳部右侍郎命甫下而浙路總理湯壽潛因言宣懷短請離路事壽潛獲嚴譴宣懷亦不復久居中仍命詣滬辦商約宣統改元奏言推廣中央銀行先齊幣制附陳辦法成式逾歲命充紅十字會會長先是日俄戰爭宣懷與呂海寰等謀加入瑞士總會中國有紅十字會自此始既拜命入都時朝廷方整麗幣制遂敕還郵部本官參與度支部幣制事晉尙書數上封事凡收回郵政接筦驛站規畫官建各路展拓川藏電綫釐定全國軌制稱新政畢舉而以鐵路收爲國有致召大變世皆責之先是給事中石長信疏論各省商民集股造路公司弊害宜敕部臣將全國幹路定爲國有其餘枝路仍准各省紳商集股自修諭交

部議宣懷復奏言中國幅員廣袤邊疆遼遠必有縱橫四境諸大幹路方足以利行政而握中樞從前規畫未善致路政錯亂紛歧不分枝幹不量民力一紙呈請輒准商辦乃數載以來粵則收股及半造路無多川則倒帳甚鉅參追無着湘鄂則開局多年徒供坐耗循是不已恐曠日彌久民累愈深上下交受其害應請定幹路均歸國有枝路任民自爲曉諭人民宣統三年以前各省分設公司集股商辦之幹路應即由國家收回亟圖修築悉廢以前批准之案川湘兩省租股並停罷之於是有鐵路國有之詔並起端方充督辦粵漢川漢鐵路大臣宣懷復與英德法美四國結借款之約各省聞之羣情疑懼湘省首起抗阻川省繼之湘撫楊文鼎川督王人文先後以聞詔切責之諭嚴行禁止儻有匪徒從中煽惑意在作亂者照懲治亂黨例格殺勿論宣懷又會度支部奏收回辦法請收回粵川湘鄂四省公司股票由部特出國家鐵路股票換給粵路發六成湘鄂路照本發還川路宜昌實用工料之款四百餘萬給國家保利股票其現存七百餘萬兩或仍入股或興實業悉聽其便詔飭行四川紳民羅綸

等二千四百餘人以收路國有盛宣懷端方會度支部奏定辦法對待川民純用威力未爲持平不敢從命人文復以聞再切責之趙爾豐等復奏川民爭路激烈請仍歸商辦不許川亂遂成而鄂變亦起大勢不可問矣資政院以宣懷侵權違法罔上欺君塗附政策釀成禍亂實爲誤國首惡請罪之詔奪職遂歸後五年卒宣懷有智略尤善治振自成豐季葉畿輔被水菑嗣是而晉邊而淮徐海而浙而鄂而江皖皆起募款籌振撫因討測受菑之故益究心水利其治小清河利尤溥唯起家實業善畜藏稱富亦往往冒利被口語云

瑞澂字莘儒滿洲正黃旗人大學士琦善孫將軍恭鐸子以貢生官刑部筆帖式遷主事調陞戶部員外郎出爲九江道有治聲移上海道滬地交涉繁瑞澂應付縝密頗負持正名尤顯意警政建總局廓分區設學堂練馬巡中外交誦其能光緒三十三年授江西按察使遷江蘇布政使時江浙梟匪蠢動出沒滬杭孔道釀成巨案侍郎沈家本建議辦清鄉朝命瑞澂主蘇松太杭嘉湖捕務六屬文武受節度瑞澂添募水師購置兵輪仿各國海軍制編成聯隊禽獲巨

魁夏竹林聲爲匪徒飲迹宣統改元稱疾乞解職溫旨慰留總督端方密薦其才遷巡撫既莅事澄吏治肅軍紀嚴警政條具整飭本末以上上嘉納命署湖廣總督踰歲到官旋實授劾罷巡警道馮啟鈞勸業道鄒履和湘民飢變復糾彈前祭酒王先謙主事葉德輝道員孔憲穀阻撓新政狀中旨分別懲革繇是威望益著其時朝廷籌備立憲瑞澂希風指凡置警興學設諮議局立審檢廳一切皆治辦名流如張謇輩咸與交驩而懿親載澤方用事則又爲其姻婭聲勢駁駁出南北洋上三年七月被命會辦川漢粵漢鐵路居無何督辦端方上言鄂境鐵路收歸國有詔嘉之越月武昌變起先是黨人謀亂於武昌瑞澂初聞報憂懼失措漫不爲備惟懸賞告密得黨人名冊多列軍人名左右察知僞造請銷毀以安衆心瑞澂必欲按名捕之獲三十二人誅其三轍以平亂聞詔嘉其引忠初萌定亂俄頃命就擒獲諸人嚴鞫並緝逃亡於是軍心騷動翌日遂變瑞澂棄城走詔革職仍令權總督事戴罪圖功並令陸軍大臣蔭昌督師往討薩鎮冰率兵艦程允和率水師援之而瑞澂已乘兵艦由漢口而蕪湖而

九江且至上海矣黨軍推陸軍第二十一混成協統領官黎元洪稱都督置軍政府既占武昌復取漢陽據漢口乃起袁世凱爲湖廣總督督辦勦撫節制長江水陸各軍副都統王士珍副之召蔭昌還命軍諮使馮國璋總統第一軍江北提督段祺瑞總統第二軍俱受世凱節制國璋與黨軍戰於蕪口水陸夾擊復漢口連克漢陽指日下武昌而世凱授總理內閣大臣遽令停攻復起魏光燾督湖廣士珍暫權段芝貴護又命祺瑞攝之時瑞澂已久遁上海始以失守武昌潛逃出省偷生喪恥詔逮京下法部治罪而瑞澂不願也瑞澂居上海四年病卒

論曰辛亥革命亂機久伏特以鐵路國有爲發端耳宣懷實創斯議遂爲首惡鄂變猝起瑞澂遽棄城走當國優柔不能明正以法各省督撫遂先後皆不顧走者走變者變大勢乃不可問矣嗚呼如瑞澂者設以罪首尙何辭哉

清史稿

列傳二百五十九

陸潤庠

世續

伊克坦

梁鼎芬

餘坊

勞乃宣

沈曾植

陸潤庠字鳳石江蘇元和人父懋修精醫見藝術傳潤庠同治十三年一甲一名進士授修撰光緒初屢典試事湖南陝西皆再至入直南書房洊擢侍讀出督山東學政父憂服闋再遷祭酒典試江西以母疾乞養歸二十四年起補祭酒擢內閣學士署工部侍郎兩宮西巡奔赴行在授禮部侍郎充經筵講官擢左都御史管理醫局典順天鄉試充會試副總裁署工部尙書三十二年充釐訂官制大臣已而工部裁省以尙書兼領順天府尹事明年授吏部尙書參預政務大臣謂捐例開仕途雜膺民社者或不通曉文義因訂道府以下考試章程試不及格者停其分發設仕學館教習之潤庠爲陸費後嘗奏進文集參以時事大意謂成規未可墨守而新法亦須斟酌行之若不研求國內歷史以爲

變通必至窒礙難行且有變本加厲之害宣統元年協辦大學士由體仁閣轉東閣大學士充弼德院院長皇帝典學充毓慶宮授讀兼顧問大臣疏陳曲阜篤生聖人之地今新建曲阜學堂必須闡明經術提倡正學若雜聘外人異言異服喧賓奪主將來聖教漸滅亦朝廷之憂又陳釐訂官制宜保存臺諫一職說者謂既有國會不須復有言官豈知議員職在立法言官職在擊邪議院開會不過三月臺諫則隨時可以陳言行政裁判係定斷於事後言官則舉發於事前朝廷欲開通耳目則諫院不可裁諸臣欲鞏固君權則亦不可言裁即使他時國會成立亦宜使該院獨立勿爲邪說所淆又言游學諸生於實業等事學成而歸者寥寥可數而又用非所學其最多者惟法政一科法政各國歧異悉就其本國人情風俗以爲制今諸生根柢未深於前古聖賢經傳曾未誦習道德風尚概未聞知襲人皮毛妄言改革甚且包藏禍心倡民權革命之說判國家與君主爲兩途布其黨徒潛爲謀主各部院大臣以爲朝廷銳意變法非重用學生不足以稱上旨遂乃邪說詖行徧播中外久之必致根本動搖民生

望炭又疏陳財用枯竭請酌停新政謂今日之害先由於督撫無權漸而至於朝廷無權庫儲之困難寇賊之充斥猶其顯而易見者也鎮兵之設也所用皆未經歷練之學生韜略則紙上空談作用則徒取形式甚至持不擊同胞之謬說一旦有事督撫非但不能調遣甚且反戈相向其不可用明矣則莫如停辦鎮兵仍取巡防隊而整理之審判之立也所授皆未曾聽訟之法官黑白混淆是非倒置舊時諳諫之老吏督撫不得用之散遣州縣捕役以紓盜責之巡警巡警無能也且不過省會及通商口岸有巡警豈能分布鄉間將來必至徧地皆盜人民無可控訴則莫如停辦審判仍以聽斷緝捕歸之州縣諮議局之設也所舉皆不諳掌故之議員逞臆狂談箝制當道督撫莫能禁之於是借籌款之名魚肉鄉里竊自治之號私樹黨援上年資政院開議竟至戟手漫罵藐視朝廷以辦給爲通才以橫議爲輿論螭蟻沸羹莫可究詰則莫如停辦國會仍以言事責之諫院學堂之設也所聘皆未通經史之教員其沿用教科書僅足啓發顛蒙廢五經而不讀禍直等於秦焚暑假星期毫無拘束彼血氣未定者

豈不結黨爲非又膳學費百倍於前致使貧寒聰穎之士流進身無路則莫如停辦中小學堂仍用經策取士凡此皆於財政有關而禍不僅在財政使不早爲之所必至權柄下移大局不可收拾疏上多不報時建設立憲內閣宰輔擁虛名而已武昌兵變官軍既克漢陽武昌旦夕下而新內閣又成立總理大臣袁世凱議修和息戰禍取隆裕太后懿旨頒示天下改建國體於是遜位詔下矣潤庠以老瞶辭授讀差奉懿旨仍照料毓慶宮給月俸如故授太保越二年病卒年七十五贈太傅諡文端潤庠性和易接物無戾岸雖貴服用如爲諸生時遇變憂鬱內結於胷而外不露及病篤竟日危坐瞑目不言亦不食數日而逝

世續字伯軒索勒豁金氏隸內務府滿洲正黃旗光緒元年舉人以議叙主事歷內務府郎中擢武備院卿授內閣學士二十二年爲總管內務府大臣兼工部侍郎二十六年各國聯軍入京兩宮西狩適遭父喪命留京辦事即日縗墨請聯軍請保護宮廷日爲宮中備飲饌並保壇廟管理藩院尙書調禮部兩宮

回鑒賞黃馬桂轉吏部兼都統內務府三旗甲米向歸吏胥代領折價名曰米折所得甚微世續商之倉場飭旗丁自領衆咸實惠纂呈四書圖說特旨褒嘉三十年以吏部尙書協辦大學士尋授體仁閣大學士三十二年命爲軍機大臣歷轉文華殿大學士充憲政編查館參預政務大臣念八旗生計日艱奏設工藝廠俾習工藝贖身家德宗崩議繼體世續獨言國事艱危宜立長君不能用宣統改元以疾乞休三年復起原官仍兼總管內務府大臣及議遜位世續首贊之太后令磋商優待條件授太保接修崇陵工程加太傅丁巳復辟懼禍及力阻之事變亟入宿衛並以殮服自隨頻年以經費拮据支持尤苦纂修德宗實錄始終其事及書成已病不能起矣辛酉年卒年六十九增太師諡文端伊克坦字仲平瓜爾佳氏滿洲正白旗人西安駐防光緒十二年進士以編修歷至都察院副都御史充滿蒙文學堂監督有請達海從祀文廟者伊克坦以達海創定國書繙譯經史有功聖教允宜附祀卽爲代奏略言學官立於漢京而配享實始於唐代宋元以來迭有增祀大率以闡明聖學有功經訓爲斷漢

儒許慎特因說文解字功在經籍專隆升附我太祖高皇帝太宗文皇帝指授文臣創立國書傳譯經史宣布文教尤極千古未有之盛夫國書字體親自文臣額爾德尼及噶蓋等而仰承聖意彙集大成詳定頒行者實唯儒臣達海達海以鑒造貞元之佐擅閎通著述之才歷相兩朝瞻言百里其初奉命詳定國書重加圈點發明音義又以國書漢字對音未全於十二字頭之外有所增加而國書之用乃廣復定兩字切音之法較之漢文切音更爲精當而國書之制乃備繙譯經典昭示羣倫功不在傳經諸儒下崇德十年旣蒙賜諡文成康熙九年復奉賜文立碑隆德報功永受恩澤旋有學士阿理瑚奏請從祀文廟禮臣復奏以爲創造國書一藝之長不當從祀未經議准查達海詳定國書字體實稟太宗指示而成作者爲聖述者爲明非唯羽翼六經抑且昭示百世部議謂僅一藝之長實未深知大體達海於聖經有表章之力於後學有津逮之功方今宗學旗學兼重國書並奉旨特設滿蒙文學堂於京師奉省亦經奏立八旗滿蒙文中學堂揆諸古者釋奠祭師之誼達海應得附祀核與漢儒許慎從

祀之例亦屬相符仰懇俯准達海附祀文廟並請敕建專祠於盛京以昭矜式查盛京東門外尙有達海瑩墓榛莽荒蕪碣碑剝落並請敕下所司修治看護用示朝廷崇尚實學蕙念儒臣之至意又代陳典學事宜略言伏讀雍正三年世宗憲皇帝諭帝王御宇膺圖咸資典學我聖祖仁皇帝天亶聰明而好古敏求六十餘年孜孜不倦又嘉慶二十四年仁宗睿皇帝諭帝王之學在於貫徹天人明體達用以見諸施行與經生尋章索句者不同仰見列聖相承重視典學之至意我皇上睿哲性成聰明天縱冲齡踐祚洪業肇基當此春秋典學之時實爲聖敬日躋之始伏維監國攝政王薰陶德性輔養聖躬慎選侍從左右將護亦既淵冲翕受法戒靡遺唯是皇上一念之張弛係萬機之治忽一朝之規制係薄海之觀瞻有不得不慎之又慎者謹爲我皇上詳晰陳之一請崇聖學易端蒙養禮重師教書述遜敏詩頌緝熙聖學精微非尋常科學範圍之所能及及宋儒有言帝王之學與儒生異尙與我仁宗睿皇帝典學之諭用意正符今我皇上典學之初應定教學科目自應會通今古融貫中西不可拘於舊例

伏乞簡派儒臣詳細籌訂鑒成憲酌時宜毋徒陳進講之空文毋虛循延英之故事庶足以開張聖聽裨益亶聰以立聖學聖治之基一請擇賢傳舊制師傅向以大臣選充期於老成典型成就君德然或入官從政講學非其所長老師大儒潛德隱而勿耀而教育精深尤非研究有素不能取益擬請敕下內外大臣各舉所知勿拘資格略仿乾隆十四年詔舉經學人員成例擇其品端學粹教育卓著成績者請旨召用隆以師傅之任分門講教而仍派大臣總司其成俾專日講於經廼不必更勞以職事其任彌專其責彌重其效彌速使天下曉然於尊師崇儒之意庶儒林有所矜式而聖德日進高明矣一請肅規制古者聖王教胄必選端方正直道術博聞之士與之居處是以習與智長化與心成我皇上毓德方新始基宜固舊制選派內監伴讀似不足以肅學制而廣箴規擬請改選王公大臣之賢子弟昕夕侍從教學相長並參考學校制度建設講堂陳列圖書彝器觀摩肄習以收敬業樂羣之效以上三事僅舉大剛我皇上今日之言動起居罔有勿敬即異日之立政敷教罔有勿臧此尤根本之至計

不可不謹之於漸而慎之於始者也伏念朝廷廣勵人才振興教育旣侏學子爭自濯磨皇上典學伊始益宜宏茲遠謨以慰天下士民之望宣統三年伊克坦與大學士陸潤庠及侍郎陳寶琛同奉命直毓慶宮朝夕入講遇事進言憂勤彌甚丁巳復辟潤庠已前卒寶琛爲議政大臣伊克坦一不爭權位日進講如故及事變誓臨危以身殉伊克坦忠直有遠識主開誠布公集思廣益而左右慮患深務趨避時復相左伊克坦憂鬱遂久病日寄於酒癸亥卒年五十有八諡文直

梁鼎芬字星海廣東番禺人光緒六年進士授編修法越事亟疏劾北洋大臣李鴻章不報旋又追論妄劾交部嚴議降五級調用張之洞督粵聘主廣雅書院講席調署兩江復聘主鍾山書院又隨還鄂皆參其幕府事之洞銳行新政學堂林立言學事惟鼎芬是任拳禍起兩宮西幸鼎芬首倡呈進方物之議初以端方薦起用直隸州知州之洞再薦詔赴行在所用知府發湖北署武昌補漢陽擢安襄鄖荆道按察使署布政使奏請化除滿漢界限三十二年入覲面

劾慶親王奕劻通賄請月給銀三萬兩以養其廉又劾直隸總督袁世凱權謀適衆城府阻深能詔人又能用人自得奕劻之助其權威遂爲我朝二百年來滿漢疆臣所未有引用私黨布滿要津我皇太后皇上或未盡知臣但有一日之官即盡一日之心言盡有淚淚盡有血奕劻世凱若仍不悛臣當隨時奏劾以報天恩詔詞責引疾乞退兩宮升遐奔赴哭臨越日卽行時之洞在樞垣不一往謁也明年聞之洞喪親送葬南皮及武昌事起再入都用直隸總督陳夔龍薦以三品京堂候補旋奉廣東宣慰使之命粵中已大亂道梗不得達遂病嘔血兩至梁格莊卽謁景皇帝暫安之殿露宿寢殿旁瞻仰流涕及孝定景皇后升遐奉安崇陵恭送如禮自願留守陵寢遂命管理崇陵種樹事旋命在毓慶宮行走丁巳復辟已臥病強起周旋事變憂甚逾年卒諡文忠徐坊字梧生山東臨清州人巡撫延旭子少納賢爲戶部主事光緒十年法陷諒山延旭逮問下刑部獄坊待至京師入則慰母出則省延旭於獄橐餽之事皆自任之布衣蔬食言輒流涕延旭戊戌新疆未出邵卒坊扶柩歸葬徒行泥淖中道路歎

爲孝子二十六年奔赴西安行在明年扈駕返以尙書榮慶薦超擢國子丞鄂變起連上五封事俱不報遜位詔下遂棄官旋命行走毓慶宮坊已久病力疾入直未幾卒諡忠勤

勞乃宣字玉初浙江桐鄉人同治十年進士以知縣分直隸查深水禮王府園地力請減租蘇民困光緒五年初任臨榆日晨起坐堂皇治官書啓重門民有呼籲者立親訊之使閹者不能隔吏役吏役不能隔人民其後居官二十餘年皆如之曾國荃督師山海關檄司文案懋南皮等縣畿輔州縣遇道差成科於民有定額而官取其贏乃宣任蠡縣值謁陵事竣贏支應錢千餘緡儲庫備公用任完縣購書萬餘卷皮尊經閣任吳橋創里塾農事畢令民入塾授以弟子規小學內篇聖諭廣訓諸書歲盡始罷先是寧津奸民陳二糾黨爲州郡害土人稱曰黑團勢甚熾嘗至南皮劫殺乃宣會防營掩捕擒陳二及其黨數人磔於市黑團遂絕二十五年義和拳起山東蔓延於直東各境乃宣爲義和拳教門源流考張示曉諭且申請奏頒禁止不能行景州有節小廷者匪首也號能

降神乃宣飭役捕治縱士民環觀既受笞號呼不能作神狀梟示之匪乃不敢入境明年拳黨入京乃宣知大亂將作適調吏部稽勳司主事遂請急南歸浙撫任道鎔延主浙江大學堂尋入江督李興銳幕端方周馥繼任咸禮重之周馥從乃宣議設簡字學堂於金陵初甯河王照造官話字母乃宣增其母韻聲號爲合聲簡字譜俾江浙語音相近處皆可通三十四年召入都以四品京堂候補充憲政編查館參議政務處提調宣統元年詔撰經史講義輪日進呈疏請造就保姆輔養聖德二年欽選資政院碩學通儒議員法律館奏進新刑律乃宣摘其妨於父子之倫長幼之序男女之別者數條提議修正之授江甯提學使三年召爲京師大學堂總監督兼學部副大臣遜位議定乞休去隱居淞水時士大夫多流寓青島德人財禮賢立尊孔文社延乃宣主社事著共和正解丁巳復辟授法部尙書乃宣時居曲阜以衰老辭卒年七十有九乃宣誦服儒先踐履不苟而於古今政治四裔情勢靡弗洞達世目爲通儒著有遺安錄古籌算考釋約章纂要詩文稿

沈曾植字子培浙江嘉興人光緒六年進士用刑部主事事親孝母多疾醫藥必親嘗終歲未嘗解衣安臥遂通醫遂員外郎擢郎中居刑曹十八年專研古今律令書由大明律宋律統唐律上溯漢魏於是有漢律輯補管書刑法志補之作曾植爲學兼綜漢宋而尤深於史學掌故後專治遼金元三史及西北輿地南洋貿易沿革尋充總理衙門章京中日和議成曾植請自借英款創辦東三省鐵路時俄之韋特西比利亞鐵路尙未建議也不果行母憂歸兩湖總督張之洞聘主兩湖書院講席拳亂啟釁曾植與盛宣懷等密商保護長江之策力疾走江鄂決大計於劉坤一張之洞而以李鴻章主其成所謂畫保東南約也旋還京調外交部出授江西廣信知府曾植爲政知民情僞而持之以忠恕故事治而民親歷署督糧道鹽法道撫安徽提學使赴日本考察學務三十二年署布政使尋護巡撫值江鄂皖三省軍會操太湖而適遭國郵羣情怙怙民一口數驚城外礮馬兵又譁變曾植聞之登城守禦檄協統余大鴻馳入江防楚材兵艦擊燬東門外礮兵壁壘黃鳳岐奪回菱湖嘯火藥局一日而亂定曾

植在皖五年重治人而尙禮治政無鉅細皆以身先其任學使廣教育設存古學堂又興實業創造紙諸廠會外人要我訂約開銅官山鑛曾植嚴拒之未幾貝子載振出皖境當道命藩庫支巨款供張曾植不允遂與當道忤宣統二年移病歸遜位詔下痛哭不能止丁巳復辟授學部尙書事變歸臥病海上壬戌冬卒年七十三著有海日樓文詩集

論曰辛壬之際世變推移莫之爲而爲其中蓋有天焉潤庠世續諸人非濟變才而鞠躬盡瘁始終如一亦爲人所難者也乃宣曾植皆碩學有遠識惓惓不忘卒憂傷憔悴以死嗚呼豈非天哉